

四庫全書

集部

欽定四庫全書

咸平集卷十二

宋 田錫 撰

論

水旱論

天之六氣進退盈虛固有常矣造化之理使然蓋陽氣  
生於子其卦直復☱五陰而一陽陽氣雖微乘得進數  
剛德浸長利有攸往然羣邪在上莫之余逆也寒暑迭  
代日月將迎以至於純陽用事其數斯極其勢斯復故

陰氣生於午其卦直姤☱五陽而一陰陰氣肇至乘得  
進數柔道浸長利有攸往雖衆陽在上莫之能拒也三  
才隨之而變化六氣循之而進退其間陰陽差軼水旱  
乘之水乘其進數則淫雨作沴旱乘其進數則亢陽為  
災水與旱其數自極然後陰晴乃順何以明之旱數  
極則淫雨繼之水數極則亢陽繼之天地不能移其數  
豈聖人能樽節其過哉當其水旱為災也害於衆盛民  
懷怨咨天子則禱於羣望諸侯則祈於境內牲玉蘋藻

奔走於土木偶之間日望其感通月俟其報應既而旱  
愈甚至於水澤竭草木枯雨彌甚則防水橫流害於衆  
民猶以為精意不虔尚貽天譴由是誠請益莊祠禱益  
勤冀其萬一通於神鑒神愈不靈盼嚮無朕早加炎焚  
雨加霖淫乃復喧然聚議於朝代黎民籲天之意佇陰  
隲必報之感貶常膳避正殿徹樂懸釋縲囚然後戚然  
復告上下四方之神不知陰之數已老而當晴衆謂之  
因禱而獲霽陽之數已極而當雨衆謂之因祠而有應

於是載潔邊豆載豐玉帛賽之酬之畏之謝之安知陽之數九而陰之數六陰乘陽之大數而作沴故鯨治水九載而弗成陽乘陰之大數而為害故湯禱雨七年而方獲易曰七日來復又曰婦喪弗七日勿逐得此乃往而必復之數自然也數有大小時有進退數之大者積年數之小者積月以是明陰陽之數上下四方之神可得而司之不可得而專之稽陰陽進退之數得水旱災沴之旨也

## 斷論

謀慮者斷之始也勇敢者斷之用也若謀慮未甚精成敗未盡見情偽未洞知而不忍欲利欲勝之意不忍小忿小恥之心卒然奮發自謂決斷斯乃剛忿而趣敗也安得謂之斷哉若謀慮已精成敗已見情偽已審而猶疑事或未濟尚憂理之未盡猶豫於大難惶惑於臨機本謀亂而不能堅守始慮撓而不能必行是謂無斷也噫排大難濟大事立大功垂大名皆由於斷也陷大惡

致大亂隳大功失大事亦由於斷也蓋謀熟而後斷則大功大名隨之而興矣智淺而言斷則大惡大亂亦隨之而陷矣昔桀惡日盈湯德日新干戈未舉而成敗之數先定也湯乃勃興應天順人一戰而克遂自諸侯而為萬乘主斯則湯之智慮已精成敗已見而果敢於斷也其次商紂縱虐而文王之德素積於民民心歸周久矣一旦武王法成湯之舉師次牧野風裂旗旆武王震恐以為天意未從遽思中輟惟太公獨排衆意以為必

克是則武王之斷未侔於太公也洎秦滅六國威名雄  
跡信有英斷長戟巨鎩銷為金狄聖謨國典焚為煨燼  
將以弱諸侯之兵也將以愚天下之民也若是果斷自  
謂超三王邁五帝然而陷大惡致大亂失大位得非斷  
於強暴而不斷於仁信乎由是知有斷於威武也有斷  
於為仁也有斷於用賢也有斷於貞介也許由弃堯之  
禪讓伯夷絕周之蔬粟是斷於貞介也管蔡流言周公  
誅之大義滅親之斷自周公始也龍逢比干以諫而死

是斷於為忠也伊霍廢黜由已是斷於為大節也燕王  
用樂生雖謗書盈篋而委任愈堅此則斷於用人也項  
籍勇傑不能終用范增所以霸王之業卒為漢有豈非  
無斷於推心乎世祖單騎入銅馬之軍人人相說說其  
推心也唐太宗之初頡利控弦者二十萬臨於渭濱太  
宗單騎隔水責之戎人畏伏下馬謝罪於時臣寮進諫  
以為輕敵上曰國家初定若示之弱即生戎心所謂智  
畧周通而決斷果敢也漢祖數項羽之罪而弩矢竊發

責敵之罪頗類太宗然為飛鏃所中萬一不幸即漢祖之斷有餘而料敵之智或淺也有以見楚子投袂而起孟明焚舟而前是皆幸而成功豈是善謀而能斷哉夫智與斷在乎兼備也若差之毫釐則失之千里使漢祖從酈生之言斷而不疑則功業無由而濟矣使太宗從高祖之言疑而不斷則家國無由而變矣今之論者皆以韓信不從蒯通之言謂之無斷錫以為韓信不斷於為忠而猶豫思亂以取誅滅也何哉當蒯通說時其心

不迴謂受漢恩深不忍叛也及其功高而疑生勢逼而猜起不能堅守初志卒與陳豨謀亂何始於忠而終於逆蓋無斷於忠節也非無斷於逆亂也詩所謂解克有終其是之謂乎亦猶孝景始用晁錯之言從之如順流將欲削七國之封弱枝而強本一旦七國共叛遽聽袁盎之言誅錯以謝七國錯既誅而亂不息豈非孝景無斷於用人而返惑讒搆之言哉若成與敗但思一決而不圖始終慨然自謂決斷不其謬歟故管仲不死子糾

之難非無斷也其非死所也晉宣得巾幗之贈不敢出  
戰非無斷也戰未便也是知智計明然後決斷則事無  
不濟矣

問喘牛論

漢書稱丙吉嘗出逢羣盜鬪者死傷橫道吉遇之不問  
前行逢人逐牛牛喘息吉使騎吏問牛行幾里而喘或  
以譏吉吉曰宰相不親小事非所以道路問鬪傷也方  
春少陽用事未可以熱近行而喘此時氣失節患有所

傷害也三公典調陰陽職所當憂是以問之錫嘗試論  
之曰宰相尊天子安諸侯在乎總要綱持大柄務求賢  
以實諸位擇能以分其職賢者在庶位能者蒞百職庶  
位得人百職具舉則理道不紊於條貫生民可得教化  
所謂勞於求賢而逸於致理由是觀之宰相猶哲匠爾  
繩墨規矩器於小大之材材適其用然後指麾衆工授  
以制度不勞親執斧斤而崇屋構矣是皇王帝霸之道  
若崇屋賢能才智之人皆衆工宰相操執大道以指麾

百官量其器能授於庶務則不勞躬親小事而理道成  
理道成則兆民悅則富且壽故民無怨嗟愁憤悲傷天  
札所以天地交泰水旱蟲霜不災於物謂之陰陽和由  
宰相總大政而致之故謂之燮理元化陶鎔品彙丙吉  
拜丞相在孝宣神爵三年夏四月至五鳳三年春正月  
薨丙吉在相位纔四載而薨當其四載之間有日蝕有  
任宣坐謀反伏誅有嚴延年得罪棄市楊惲妄言天不  
雨之事後坐怨望處死公卿奏惲黨皆免官京兆尹張

敞亦被奏因亡於是京師吏民解弛桴鼓數起而冀州部中有大賊上思敞功徵拜理冀又嘗有詔曰今郡國二千石或擅為苛禁又有詔以吏不廉平增加其俸驗茲數事冬朔日蝕天久不雨盜賊擾境官吏伏法斯亦未為陰陽和而天地泰况羣鬪者死傷橫道高陵民兄弟爭田復未為庶民和悅庶民既未之和悅官吏又未之輯睦河南殺人流血數里豈不感傷和氣而致春溫溫和失時人亦自覺何必因牛之喘方認時氣差違矧

丙吉拜相已來未能進一賢人黜一不肖有黃霸不能  
早用為同列有于定國不能早引為同寮恥府中按吏  
之名容車上吐茵之過不足多也欲待歲盡課人之殿  
最方行賞罰賞罰欲加誰哉抑聖賢理天下必致其道  
然後政成而民悅雖使夔契為政亦待三載而成功若  
期月化醇未之有也後人讀漢史言賢相皆服膺問喘  
之理企踵調元之道不詳事實錫謂丙吉矯歟誠失問  
歟

府試守在四裔論

限五百字  
以上成

春秋以天下有道守在四夷詳丘明之書觀古人垂訓  
以為明君在上以道德化育良相作弼以謨猷經緯故  
地天交泰品物咸亨和氣感於天故四時六氣無差節  
候矣至化孚於地故羣動萬彙悉遂於生成矣當是時  
諸侯之國秉璋執圭奉朝廷之政令四裔之長率貢納  
贊服帝王之威德然聖人以道為城池以仁為網罟牢  
籠禦備使悉歸於術內範圍包納俾咸入於彀中故春

秋曰天生五材民並用之又曰誰能去兵孟子曰至仁無敵於天下是則干戈之用以順時教戰也用以威裔心也仁義之用以觀俗設教也俾以遂物性也以時教戰者春蒐冬狩因農之隙閱兵之實俾民知禦寇之教也所謂安不忘危理不忘亂故仲尼曰不教民戰是謂棄之斯乃禦侮之大端而防患之先備者也守在四裔之義其在茲乎雖以道德羈縻以服其心然以威武震耀以制其力守之至理請試別白而論之魯史曰聖達

節次守節是則君子理一身則守五常之教聖人理天下則守萬機之要守而得其理道則百職具舉而庶政允釐百職既具舉而庶政既允釐則四裔不得不畏服也守之一說亦取蒐狩之狩謂天下有道海內無事威制之柄惟在四裔故曰守在四裔也何哉遠人之心不可以仁信責之不可以禮教束之怙強則搔邊畏威則款塞故賈誼有安邊之策晁錯有禦戎之辭載在前書確為嘉論以為堯舜之聖禹湯之明文武之德其覆之

也如昊穹照之也若春景萬物靡不泆羣品靡不安當  
是時比屋可封而外戶不閉猶未能銷釋兵革亦未能  
徹去備禦務在化中國以道而制遠人以術也今國家  
承百王之後應五運之興陰陽和風雨時日月貞明黎  
元胥悅封疆萬里琛貢交至雖漢武伸蕩定之志唐時  
置羈縻之郡未侔於今日未偕於聖朝矣方今乃守在  
四裔之秋也

御試登講武臺觀兵習戰論

限五百字  
以上成

春秋曰天生五材民並用之又曰誰能去兵是知堯舜禹湯而下迨於宗周之至聖鮮不以仁義道德牢籠天下而以甲兵武備以制海內故仲尼曰不教民戰是謂棄之故周有井田之法春蒐夏苗秋獮冬狩乘三農之隙以教民戰夫武有七德禁暴戢兵安民和衆之為用也故古先帝王臨御天下持威制之柄於上以制四裔而齊萬國得不以兵為本焉昔晁錯上漢文之書曰兵不堅利與空手同是知兵不得不堅而戰不得不習唐

開元之際海內無事明皇幸於驪山講兵而閱焉於時  
稱為威盛今國家自先帝臨御以來弭禍亂而安黎元  
勝兵數百萬所謂霸王之器在手故遠戎畏服諸侯恭  
肅豈非甲兵之用善弛張卷舒由聖人乎今陛下乘乾  
坤交泰之時而當寰海宴清之際雖以詩書禮樂以化  
天下而致民於富壽之域然能遵堯舜禹湯之用心而  
弗忘戰以是知卜年之祚方遠而卜世之基彌固登崇  
高之臺以講武焉講武之大體實觀兵之威武焉既威

且武而有習戰之術以是衆戰則何敵弗克夫是三令五申雖古之習戰之法而易貴師貞之古今睿謀神武以兵戰之機以時習焉天下畏天威而服聖德豈非前書所云善師者不陣者乎四裔之心咸走梯航玉帛而來朝者由陛下德先勝而兵有威也今論兵甲之利府庫之備士卒之勇土田之廣疆場之安雖漢武承文景之羨財而利甲兵者弗能加焉區域之安蒸黎之泰風雨時順天地氣和雖太宗草隋之餘而善整武備者亦

弗能至焉

咸平集卷十二

欽定四庫全書

咸平集卷十三

宋 田錫 撰

箴

相箴 并序

智周萬物曰聖道濟萬民曰賢聖乃君德也賢亦君德也然天無二日土無二王故聖人立則賢者事之賢者立則聖人事之周公相成王乃以聖事賢者也仲虺相成湯乃以賢事聖者也舜禹在十六相之間即以聖事

聖者也高宗命相稱若金用爾為礪若旱用爾為霖若和羹用爾為鹽梅若濟川用爾為舟楫此得命相之大旨也昔管仲相桓公也以隰朋善擯贊之禮請立為司賓以甯戚能稼穡之政請立為司田以賓胥無明於刑法請立為大理以王子城父諳於戰陣請立為大司馬以東郭牙忠鯁謹直請立為大諫乃曰君欲理國強兵則五子在焉若欲霸王則夷吾在此此乃得為相之大體也是知宰相所居者國之大位所務者國之大事所

憂者國之大難所理者國之大柄百職如網罟羣官若襟袂也提綱則網罟不紊舉領則襟袂自整所謂挈霸王之器授於聖哲之主也故陳平不言細務丙吉恥按小吏所以府無鈴閣門不施闌示與邦國大同也不於衆務之有隔也許扣閣以白事呼宜祿以立聞是表宰相之貴異於臣僚之貴也宰相之職貳於帝王之職也君在座見宰相則起贊拜者揖而告之君在車見宰相則下贊禮者導而告之故伊尹謂之阿衡呂望謂之尚

父聖人所以隆其禮若是也貴其才亦然也所任非輕所責亦重若天地有大變邦國有大災則引咎責躬謝病免職天下知其隆貴而不知其憂勞受其陶鎔而不知其功業五帝之時人謹事約故宰相得致其理三季而下俗薄文弊故宰相尤勞其精昔玄宗用姚崇宋璟則開元之初天下康濟用林甫國忠則天寶之末海內喪亂豈獨臣之過也抑亦君心之怠也當憂勤之時則逆鱗犯顏之臣謂之忠蓋而聽納也及安逸之後則苦

口沃心之諫謂之狂妄而厭聞也豈徒然哉昔魏徵相  
太宗也以抗直克保其終憲宗之用李絳也以剛正不  
得其死蓋君臣之際委遇方深則讒謗生焉禍難起焉  
讒言不惑則匕首竊發豈惟正直忌於衆目抑亦富貴  
揺於人心王涯遂死於疑兵竇參亦逢於刺客是知為  
相不易為君亦難不惑讒疑君之難也不事富貴相之  
不易也德宗勤儉之令主也惑於讒疑贊皇才畧之賢  
相也溺於富貴故宰相所先者才畧所重者識量劉幽

求克平內難唐休璟善料邊功乃才畧者也張九齡請  
誅祿山婁師德密薦仁傑乃識量者也有量則深沉而  
難測有識則敏速於先見使玄宗用九齡之言則祿山  
之亂不生矣使天后不言師德之薦則仁傑之明不知  
矣夫伴人遷善遠罪而不自覺者禮也致君去危就安  
而不自悟者賢相也蓋弭亂於未形制理於未兆羣官  
但受其節制萬機莫測於運用也黃閣之下敢獻箴曰  
惟天有斗斡運化機日月五緯陰陽四時斗柄所指隨

其推移惟君有相調燮天下朝廷百揆天地萬化政柄  
所指隨其強霸一國具瞻三台之象所務才畧所先識  
量量若不寬不能容衆識若不明不堪大用才若不長  
不堪任重畧若不深不謀公共識量有智為相之器禮  
樂征伐為相之轡按轡理人利器事君獻替輔弼啓沃  
經綸乃成大業乃集大勲堯得元凱垂衣而理湯得伊  
仲順人而起漢得良平亂畧乃弭唐得房魏王道如砥  
君之股肱祿既厚焉君之耳目貴亦極焉祿厚驕生貴

極忘遷延齡調上林甫忌賢元載專寵吉甫弄權衆僚  
位卑不敢抗言百官禮隔誰肯犯顏阿順久矣傾已忽  
然性習相近始終勿渝進賢為黨道則不孤至公為任  
身則無虞民既富壽物亦昭蕪狂生不佞敢告僕夫

將箴 并序

聖人能御將良將能御兵御得其道則運籌料敵留侯  
運籌知彼我勝敗如觀掌上王剪攻於荆土非六十萬  
不足禦敵晉宣圖於壽春非三百日不足用兵其籌料

本末若是之審也然而有謀而遲緩者將之病也有謀而心速者將之病也故軍志曰智而心怯可窘也急而心速可久也有驟勝則驕不可不戒也有驟勝則怠不可不備也項梁敗於定陶驟勝而驕者也庸人敗於臨品驟勝而怠者也能理其偏材知其所病戒其驕怠是謂知與為將也伊尹呂望王者之將也卻敎管仲霸王之將也孫吳吳起戰國之將也其材不同同歸於料敵其功不同同歸於用謀謀既素定戰無不克故武侯以

葛巾羽扇指麾三軍羊祜以輕裘緩帶摠提萬旅謝安知合肥之勝對碁自若宋武知外水之宜封函預言其何然哉蓋所料無失而當必捷者也雖云五帝有武備而無所用是謂善師不陣者也湯武之舉是謂善陣不戰者也桓文之舉是謂善戰不敗者也錫以為制理於未亂即善師不陣者也制勝於未戰則善陣不戰者也得機於一時則善戰不敗者也何必桓文之師不及湯武之舉乎湯武之舉不及五帝之有備乎韓信以尺書

定燕亦善師不戰者也穆子以全城克鼓亦善陣不戰者也但務察機在目料敵在心自嚴將軍之令不受天子之詔為將之道盡矣嗚呼機時難得而易失功業難成而易敗不可以圖富貴而欲為將也不可以愛威嚴而欲為將也有全材受君之命可也無全材辭君之命可也不可以已之好尚而欲陷民於鋒刃三軍之起千里趨戰一國奉戰萬民陷沉應機之速破敵之急血膏草墊尸擁流水而將帥自以為功名以為富貴以為威

嚴以為便利可不惻隱乎可不咨嗟乎况勝不可保袁  
紹敗於官渡衆不可恃馬服挫於長平皆圖功貪名之  
過無輯亂愛民之心加有私忿謀逆者有幸亂而叛者  
如漢之黥布韓王信即私忿謀逆之人也晉之王敦桓  
玄即幸亂以叛之人也輕士卒之命為嗜欲之深志可  
不為傷心哉且周之饑也伐商而年豐衛之旱也伐邢  
而降雨豈徒順於人欲抑亦合於天意是謂天人合發  
萬變定機乎欲期將帥之臣先本仁信之用故作箴曰

兵者凶器戰者危事國有外患君先擇帥受服於廟授  
鉞於社鑿門而出建牙指敵一國所仰三軍以律苟非  
將材必自敗績先以仁信次以智勇勇則三軍增氣智  
則謀慮必中信則賞罰無黨仁則甘苦必共信智未明  
仁勇或虧難保強勝必致傾危天之雷霆警物為威國  
之征討弔民為辭晉文伐原以信為機漢祖約法以仁  
為機羊祜近吳以禮為機韓信襲齊以智為機呂蒙襲  
荊以恩為機合若符契不差毫釐叛者伐之服者舍之

亂者平之凶者戮之譎詐有時不可常施殘忍非仁不可念茲苟違斯理是奉其私

嫉惡箴

仲尼有云人而不仁嫉之大甚亂必攸因敬違斯言禍反乘身儻無威柄又無權政欲攻其過適令距命朱雲抗許方慶糾彈愈諫佛骨賁怒閹官言出衆怒貽譏謫官上自君臣下及朋友善道以告忠言而誘言苟弗從悔追勿後欲捐彼怒宜緘余口周公嫉惡有權有威去

惡之易易於轉規伊尹懲過位重言崇懲過弗難速於  
旋踵若異於茲戚無自貽寬以蓄衆藏機待時時至機  
發誅除罔遺誠之守之無忘箴藥之辭

用材箴

天運四時地生萬類以覆以載各得其位天地猶爾人  
胡求備克以仁化舜以孝理稷專播穀禹務導水聖賢  
猶然人胡求全是以有才者不必有德有德者不必有  
言與人結交能護其短掩短錄長交即悠遠任人之職

能從其長錄長掩短邦實阜昌毋好之則忘其不肖惡之則忘其允臧執心至公取其所強馬或奔蹏乃致千里士有跣跣可任以事一善可稱則勿求具美然後會衆善以涖庶官民實攸暨

求名箴

君子所懋者德所貴者名名高由乎德厚譽美由乎藝成德藝苟闕謗毀亦生譽善毀惡如影隨形勿學小人欲誣君子唯已弗脩唯名是企設矯與詐違謗避毀矯

終不常久而遂彰人皆指笈名亦消亡箴行在已華名  
自至戒於曲求無忝無愧

規過箴

人或有過爾欲相規過且未改中已生疑疑不一途滋  
蔓多岐懲怨名怒何莫由斯怨淺謗生怒深禍隨是以  
君子慎於樞機樞機之理搃乎慎言規人之過其言猶  
難孰慮其宜細詳厥理言苟輕出過反在已雖云忠告  
不能者止妄欲善導豈獨疑爾愈令其心增於汰侈

守默箴

惟天之默三辰燦然惟地之默萬物生焉君子之默百  
行昭宣苟無昭昭之名赫赫之德德未為人所仰行未  
為人之式欲訥而言欲寡而詞孰謂爾無包藏孰以爾  
為秉持夫事有節而理有機機赴節會一言眾怡所謂  
時然後言敢忘聖人之規

聽箴

聽貴於微方謂之聰無怒抗直無悅順從順從之言如

簧如綺聞之勿喜當酌於理抗直之言如鋒如鋌勿以  
為傷當從其長未必逆耳皆謂之是未必順詞皆生於  
疑外得所聞內宜深思無自忽畧差於毫釐有諭有告  
語難遽發必托微詞冀爾深察有猜有嫌言雖直形必  
露微言貴爾審聽心馳意征聽則不明凡聆其語必專  
迺誠

視箴

視貴於微方謂之明察於未兆見於未形蓋以理取不

以目視既得兆朕預圖臧否禍福有自成敗有源得喪  
有迹理亂有先憂樂在色喜怒亦然如萬物在地而衆  
象在天如珠玉沉潛而輝采昭宣觀象知來識鑒宜前  
違難遁惡爾自圖全拯危救禍爾合勉旃視人之禍從  
微拯之無待禍熾方欲扶危視人之難從危安之無待  
難至方欲維持見機之理念茲在茲

咸平集卷十三

欽定四庫全書

咸平集卷十四

宋 田錫 撰

銘

湯盤後銘

并序

君子為善汲汲惟日不足故湯盤銘曰苟日新日日新  
又日新昔湯作夏諸侯日修厥德以成齊聖廣淵之道  
致夏民之心歸亳益眾如渴者赴飲燥然促促欲速於  
酌而挹之也故湯德益勝桀罪益大而禍不可解德勝

而位不可避位來逼已是以有夏之賢臣曰伊尹歸亳而贊之相之有夏之疲民惟億兆望亳而歌之舞之桀遂喪國其滅也忽焉湯遂得位其興也勃然大哉聖人之心與天道合天道健而行者也其行不息故日月代明四時六氣萬彙從之而不斁矣聖人懋其德兢兢業業日慎一日易曰夕惕若厲無咎故百職萬國兆民亦從之而無斁矣夫天子大位聖王守之則大理賢主守之則小康中庸之主守之得其輔則理失其輔則亂闇

暴之主守之則大亂矣古者盤盂皆銘彝朝用之觀其  
銘暮用之堅其志聖與賢克己以荷祿闇與暴肆欲以  
自敗中庸之主殆可做戒爾錫因作湯盤後銘申有商之  
祖訓熙聖人之道也曰

成湯盤銘太甲弗視微伊尹放於桐宮宗祧幾墜克念  
作聖罔念作狂雖曰聖哲無豫從康太宗念理念念不  
已果致昇平慎終如始玄宗念理念念忽虧姚宋云亡  
其德遂衰噫修德罔怠日不暫替厥民大賴永克永世

白獸樽銘

并序

君好諫則直臣進而邪臣退君好諛則佞者安而忠者危悅佞忌忠翹足待亡邦之禍斥邪用直反掌有太平之期當晉運承金武帝泣祚鑒往古之理亂詳前代之興亡思得嘉謀渴仲山而補衮願聞謹論慕大禹之拜言於是庭設酒樽樽施白獸使獻替之士蹇諤之臣將欲排金門扣玉階抗真誠吐忠諫必得挹酒漿而見志于旒冕以犯顏法膳夫之佐樽誘隨季之及雷耳佩玦

者知其有斷珥貂者表其外剛招虞人以弓則不來賜  
武夫以鉞則專殺皆用物以旌其意也飾外以知其內  
也所以虎者取其威猛以壯其心真無觸鱗之懼酒者  
取其醇和俾悅其性以生沃心之謀所謂君誘臣之諫  
也臣合君之道也得澤山相感之理見地天交泰之心  
錫以為感之以誠則純信之士來感之以恩則死節之  
士至感之以信則慷慨之士進感之以言則鯁介之士  
歸故成湯待士於總街齊桓錄於寶法皆降尊嚴而下

卑賤示誠信而求許謨豈不以大臣固寵則惜言小臣怯  
威則懼諫苟汲善之誠未著好諫之志不專則上之過  
失或未聞下之精誠有未盡則面柔曰戚施口柔曰籛  
籛蔽我聰明壅我嗜欲故君欲見獸樽在下則惕惕之  
志不得不警戒而守也臣見獸樽在前則諛諛之心不  
得不憤悻而發也所謂挹之以忠言酌之以直諫味之  
以醇和之德器之以公共之道苟念終以入始慎末以  
固本則善旌諫鼓又何異焉夫誘諫在乎樽而用諫

乎君且臣非以直言為難而君以從諫為難從諫非難  
辨惑為難其有豐珍厚貨以移君心君則離法而悅之  
者有悲色哀辭以移君心君則離法而憫之者有密姻  
近戚伊優相摩以移君心君則離法而惑之者是知執  
一御眾君之明順諫如流君之道苟異於是樽實虛設  
因銘之云

白虎之象為樽之飾壯彼瞻視來其抗直壅蔽斯聞謨  
猷必陳上或違道下得觸鱗君或拂諫臣敢愛身君臣

相濟上下交親苟忘念理惟欲是恣雖設斯樽適為虛器

夏鼎銘

并序

盤古之上有崑崙中柱其周三萬里巨靈之迹有太華  
仙掌其高五千仞一則制黃輿之動一則通洪河之流  
事亦近情豈齊諧之誌怪言非據實鄙古人之不經惟  
堯典可詳禹謨斯在當羣陰作沴洪水橫流浩浩滔天  
若載舟也湯湯懷山若習坎也農無田以稼穡女無桑

以蠶績萬宇將為江湖兆民憂為魚鼈非聖人之智無  
以排大難非聖人之功無以濟大艱當其鑿龍門通砥  
柱䟽百谷導衆流陰陽戰而復和天地否而復泰猶以  
為窮邊大澤深山曠林有魑魅姦慝之災有猛鷲瘴癘  
之害俗有所未習人有所未知於是象九州鑄九鼎赫  
曦連月方收其炎熱九鼎俱成山形谷聲如在其初也  
睿智如神王言如綸命諸侯而貢金空羣山而伐薪萬  
講一鼓吹風吸雨如媧皇仰天待鍊石而將補其終也

巽戶風絕離宮火歇餘霞猶狀任公臨海得鼇魚而待  
烹岌岌然在萬乘之前巍巍然列獲闕之下日月星辰  
之分野山龍華蟲之文章莫不上應昭回下詳區域未  
必河圖括地象始判草伐保章辨土風方知陵隲有以  
見鼓天下之動入我牢籠取域中之大歸我掌握開生  
民之耳目為後世之楷模燥濕不變者金之貞蕩落能  
包者海之量所以紀鏤與山河竝久圖象將世運常新  
瞻之在前不出戶而知天下仰之彌高不闕牖而見天

道乃知聖人備物致用立功成器有位則可保失道則相遷故桀昏其德遷之於商商得之所以載祀六百紂縱其暴遷之於周周得之所以卜世三十洎定王微弱戰國縱橫楚子無君敢有輕重之問丘明作傳備存應對之辭見寶鼎之有歸由天命之所授然則天下大鼎也黎元鼎錕也惟左輔右弼前忠後良以文明為火而爨之以教化為味而調之則日月明陰陽和天地靜區域安故王孫善言在德不在鼎聖人垂訓以道不以強

願追三代之闕文以揚伯禹之鴻業銘曰

萬象鱗差璿璣正之六合輻輳會要觀之聖人既作萬  
方攸歸鑄鼎象物神姦乃知金鉉恢廓寶圖融輝得之  
非霸失之非衰霸者道昌失者德虧公共之器聖哲無  
私

卜臺銘

并序

神以知來智以藏往蒼龜之靈也識進退存亡之機得  
悔吝吉凶之朕君子之明也漢世高士成都逸人信珮

仁冠獨得昊穹之爵玄闕通鍵自開衆妙之門窮達不  
移其心豈喧靜欲拘其趣故揅著於卜肆將誘善於輿  
人驗太史之簡編考先生之故實人子從而卜必告之  
以孝道也人臣從而卜必喻之以忠規也豈不以蚩蚩  
末俗若山下之出泉我必導其源而濬其流冥冥若真  
若懷中之無物我必居其靜而觀其動以蒙養正若聚  
衣加爛錦之文用晦而明比良玉有成虹之氣故萬乘  
聞其道玉帛禮之而弗來五侯知其賢弓旌聘之而不

至是謂水官既廢豈易得於真能弋者可施徒仰觀於  
黃鵠先生之道既如彼先生之名又如此不獨發揮象  
象喻人之吉凶實將隱見市朝鎮人之躁競蓋先生之  
智靈於著龜先生之明洞若氷鑑且枯草腐骨安足稽  
疑坤馬乾龍固無定體且叔向以五難卜於子干知其  
蔑濟伊尹以五就卜於夏桀知其必亡于公以陰陽卜  
其子孫知其貴盛智果以視瞻卜於韓魏知其變更又  
何必詢幽贊於六虛取繫辭於十翼先生以天方咎漢

卜孝哀不久乎以天未悔禍卜王莽將篡乎以火德未  
衰卜世祖中興乎識者知先生以道卜於時退觀理亂  
昧者謂先生以筮疑隱於闌闌蓬萊水淺既難駐於仙  
蹤河漢槎流但遐思於往事願以直筆銘於卜臺曰  
真格仙風飄如鸞鶴餘芳遺烈馨若蘭菊流聲走景變  
陵遷谷後人作臺在坊之曲難問探蒼空思握粟我來  
徘徊詠歌芳躅

几銘

親仁可以自托友賢可以自扶求仁得仁必馳必驅若  
隱几以名憑几而呼則仁賢斯遯斯役來趨嗚呼賢既  
遯身即孤

杖銘

持人之顛扶人之危於國也於家也無得而忘之

劔銘

圖難多疑為甚惑莅事無斷為自塞必在淬其志率其  
職大夫必果敢決斷以取剛克

孟銘

君子憂道食不遑味所以顏子一瓢飲一簞食雖屢空而無恥

硯銘

治石如之何載磨載琢治藝如之何以文以學藝成如之何以禮以樂

筆銘

古之良史言必錄而事必紀若生無令名即沒加惡謚

以為子孫恥君子措辭幸無自私

枕銘

君子有四時朝以聽政晝以訪問夕以審令夜以安身  
苟名未揚於親惠未及於民敢思甘寢以忘夙興夕惕  
之勤

盤銘

湯乃聖人猶務日新吾儕何人敢怠於勤用于斯觀于  
斯即頌成湯之遺文

弓銘

天之道有弛有張盈則虧盛則亡是以君子以謙而持盈故位彌尊而名益彰

箭銘

婞訐非直忠信為直勿枉道而諂人常守道而保身

珮銘

信不可忘謙德彌芳服謙珮信其名鏘鏘

尺銘

言與行相顧名與實相副以俾他人取為法度

鐘銘

德修於內聲聞於外行積於身名彰於人業茂於此譽  
洽於彼其器濩落音則溥博其氣春容韻則穹隆處厚  
持重物莫傾動詢爾宏圖應以嘉謨咨爾小道隨以忠  
告恢廓爾量俾人法象無以錚錚所不足尚

後序

書曰惟狂克念作聖惟聖罔念作狂是聖與狂不相遠

蓋先王趣人歸善之速也湯聖人也銘於盤有日新之  
戒正考父賢人也銘於鼎有益恭之命苟非聖與賢而  
在中人之域言與行終日不離戒慎則僅可免過安敢  
望偕於君子哉儻斯須而忘檢慎則差跌而獲罪戾矣  
因作箴銘以自戒也



咸平集卷十四

欽定四庫全書

集部

咸平集卷十五  
九

詳校官園子監司業臣納麟實

檢討臣何思鈞覆勘

總校官知縣臣楊懋珩

校對官中書臣葉蘭

謄錄監生臣馬衍宗

欽定四庫全書

咸平集卷十五

宋 田錫 撰

律詩

七言

花雨比下秦中

雨裏飛花片片紅  
雨微花亂轉溟濛  
川原何處連天草  
蘆幕無人半日風  
寂寞劉禎新病後  
淒迷莊舄苦吟中  
何堪更是黃昏景  
鶯冷鷺寒恨想同

寄蒲城宋白小者

春日閒銷一局碁春愁還得數篇詩高吟大醉何人問  
英略雄圖欠已知破產雖無容足所丈夫豈合以家為  
時來富貴終須有懶學梁鴻賦五噫

離懷

離懷如醉復如癡脈脈無言不展眉秋草空牽幽意在  
征軒疑有斷魂隨殘星更漏門開處斜日簾櫳酒醒時  
此恨誰能解消遣因題紅葉偶成詩

自勉

飄泊年年頗恨身  
梁園未到滯咸秦  
上樓獨為青山立  
攬鑑初驚白髮新  
莊叟何曾悲失馬  
宣尼猶自問迷津  
功名分有終須得  
莫強憂愁耗爾神

夏日即事

王師猶未下全吳  
何日封章賀獻俘  
正是鬱蒸生瘴瘧  
可堪水潦滿江湖  
威宣鐵軸千艘盛  
勢撼金陵一壘孤  
羈客無能為籌略  
閒消白日覆碁圖

春雨

天寒雲彩變春暉  
霖霖來如曉霧飛  
著物先饒芳草濕  
盈空旋翳碧山微  
鷲邨樹密吹應徧  
鴛瓦簷高滴尚稀  
丞相追班方入賀  
沙堤柳色正依依

樽前吟呈宋白小著

三年多謝主人翁  
盃酒相寬禮數豐  
唯惜時光如走馬  
懶詢天道似張弓  
秋深街巷槐花雨  
夜靜廳堂葦箔風  
盡是無慆腸斷處  
都将分付醉鄉中

代牡丹酬答

太素有醉贈  
牡丹之作

舒元輿是賦家流我有餘妍不盡收今日謝君胎好句  
恨無雙珮畧相酬神仙見謫情雖薄風雨相輕恨未休  
為報悅人須以禮不同蘇小耐慙羞

多情

多情如病苦難醫頭緒多於折藕絲送客落花行馬處  
望鄉殘月倚樓時憶來幾入春深夢感極翻成酒後悲  
大抵為君言不盡彩牋閒詠合歡詩

寄韓丕進士

嵩室亂峯三十六嵩陽今復住何峯已因詩好聲名出  
却為情高仕進慵白鳥白雲秋色樹水南水北月明鐘  
逍遙自得閒吟興誰識夫君是臥龍

覽韓偓鄭谷詩因呈太素

風騷賞古少知音本色詩人百種心順熟合依元白體  
清新堪擬鄭韓吟搜來健比孤生竹得處精於百鍊金  
唯我與君相唱和天機自見不勞尋

渭北即事書呈太素

渭北居來似塞垣  
三逢堯歷度寒暄  
家貧老幼思歸國  
性僻交朋少及門  
天暖憶遊沙苑寺  
雪中會過洛河邨  
流年又是重陽節  
賞菊論詩酒一樽

醉題紅葉

拾筆閒題紅葉時  
醉容相向亦相宜  
塞垣風勁應吹盡  
江國霜微想半衰  
嫌聽滿堦鳴夜雨  
曾看臨水映疎籬  
春光不許長如此  
旋放寒梅嫩柳枝

寄題象耳寺

二十年前會憶游，彭亡渡口泊孤舟。  
一程林下登山路，百尺溪邊汲水樓。  
磬韻似煙和燭，裊松聲如雨入窗流。  
別來往事都成夢，誰寄篇章問惠休。

促織

西風嫋嫋欲昏黃，草木蕭蕭綠翅涼。  
閣傍遠燈催絡緯，獨經遙夜伴啼螿。  
露濡蟲網絲潛斷，月照澄江練有光。  
幾處踈砧紅葉寺，誰憐弄杼不成章。

憶梅花

三年不見遠江梅  
長到梅時把酒盃  
似共故人千里別  
空思近臘數枝開  
心隨曉月經鄉渚  
夢與春雲傍釣臺  
金葉瓊花風雪景  
憑誰圖畫入關來

和太素春書

風幡輕細翠悠颺  
樓閣輕寒水滿塘  
柳絮微烟吟思足  
梨花隴月睡魂香  
江山似畫憐湘浦  
魚笄嘗新憶華陽  
早是春陰已無賴  
可堪中酒惡情腸

和太素早春書事憶游京國

新年吟咏喜經旬  
金粟山邊渭水濱  
微雪尚妨天氣暖  
衰林先讓鳥聲春  
牽情但恨梅花謝  
醒酒空思桂蠹辛  
深感相將游汴水  
夢中楊柳已迷人

覽太素新編

蜀國香牋似彩霞  
裝成近集入京華  
千篇詩好精靈哭  
百軸文雄俠少誇  
繁富禹王新職貢  
妍明春帝曉駕花  
彤庭何處安排好  
李謫仙才稱草麻

吟情

風月心腸別有情靈臺珠玉氣常清微吟暗觸天機駭  
雅道因隨物象生春是主人饒蕩逸酒為歡伯伴縱橫  
莫嫌宮體多淫艷到底詩狂罪亦輕

和宋玄進士對雪

風迴玉宇拂窻欄欲晚層城料峭寒含月有光吟不盡  
著烟無迹畫方難江春南國蕪梅落塞臘西山向竹殘  
何處多情偏入賞狂隨舞袖遶盃盤

冬夕書事

堪嘆棲屑客長安風雪加添近臘寒凍筆呵來書字淡  
孤燈挑盡向窗殘十年苦思詩千首一夕迴腸事萬端  
家住天涯歸未得嶺梅江蓼自辛酸

對酒

去年秋值罷文闈今歲無慘自陝歸雪月好吟還唱和  
風雲未至且依違江南梅早多紅蒂渭北山寒少翠微  
猶賴一樽消遣恨不堪棖觸躁時機

暮冬閩鄉遇蕭霸赴任

嶺外路遙君赴任  
陝西年盡我歸家  
長亭際會情無限  
一夕分飛恨又賒  
夜話無燈松火繼  
曉行乘月亂山斜  
七千里驛誰相伴  
雪裏寒梅已放花

殘冬書事呈宋太玄

歸來何物可消憂  
縣寺蕭條懶強游  
酒價未償重貫取  
雪詩休厭且交酬  
兼憐春近如迎客  
莫惜年殘似急流  
天子承祧重文物  
花時蚤約入皇州

寄梁周翰補闕楊微之宋白二拾遺

飄零蹤跡尚堪悲，唯向三賢最受知。  
少俊有名輸賈誼，宦游多難比張儀。  
詩中老格何人愛，酒後佯狂識者嗤。  
比省郎官應見誚，明時猶尚進身遲。

寄宋準學士

鸞輿西幸郊天日，洛水橋南乍識君。  
投分塤篪無異曲，定交蘭菊有餘芬。  
別來信阻年將盡，望去臺高日又曛。  
堪恨支離何所似，波中萍葉嶺頭雲。

和宋太玄臘日

逢臘欣酬吟詠才已知春色向人來  
口脂潤逐銀嬰賜  
面藥香隨鈿合開  
梁苑詞臣堪賦雪  
壽陽公主好粧梅  
更憐罷獵歸侵夜  
重對歌筵紅燭臺

三月二十八日書懷

惜春將盡自徘徊  
巷館殘陽戶半開  
芳樹更無鶯舌語  
故巢空有燕歸來  
音書杜絕家千里  
愁憤消磨酒一盃  
地狹長沙何所適  
行謠方憶摘楊梅

渭北春盡日作因思蜀洛舊游寄太素

九十日春知枉度樽前無賴獨咨嗟空城北走諸陵道  
古苑南連百里沙翠憶玉津官舍竹繁思金馬故城花  
去年方與君游洛况味爭如不在家

即事

殘花飛盡留芳草索寞孤懷話未能天氣暄寒猶未定  
春衫脫著自無憑荔枝結子思南越湖水宜茶憶竟陵  
看是清和時又過林亭何處度炎蒸

晚望因寄宋太素

春深水榭絮紛紛支策臨高日欲曛故國已迷巴徼路  
斷腸空似嶺頭雲燕飛芳草隨天遠鶯囀殘花隔竹聞  
物景感人情不盡因成吟咏寄於君

幽居

寂寂閒居客至稀靜中滋味意何歸因探易象知深旨  
自喜吟高得化機桑露乍寒蠶欲老草烟纔暖蝶交飛  
樊川物景終南翠遂性空思杜紫微

府解後有詔旨權停貢舉因成長句寄太素兼

簡韓丕茂才

一名倜儻動皇州寄應王門作解頭將領風騷推李杜

較量英勇讓曹劉

曹公謂劉備曰天下英雄惟我與君爾

春闈有詔俄中

輟秋賦隨時亦暫休金殿制科思取應遠飛章句問嘉

謀尋有勅開貢舉太素時為左拾遺知兗州

御試二儀合德詩

七言六韻用心字為韻

聖主承桃兌澤深乾坤玄化合堯心黃輿比厚施生植  
白日齊明遠照臨周普至仁符積載霽流睿渥若春霖

游鱗在藻方諧性  
獷俗乘桴自獻琛  
和悅感人生瑞靄  
穆清流詠在熏琴  
小臣幸與觀光試  
敢效祈招頌德音

寄陳處士

簿書軍吏日相隨  
心在誼譁旨趣卑  
明月夜吟無意緒  
白雲秋約笑羈縻  
宛陵古寺經游少  
疊嶂名樓眺望遲  
堪重高人陳處士  
不來尋訪已多時

登郡樓望嚴陵釣臺

谿上嚴陵古釣臺  
倚樓凝望自徘徊  
先生能保孤高節

英主嘗師王霸才日暮白雲迷草莽岸平春水浸莓苔  
登臨不盡微吟興花落東風首重迴

寄陳處士

柳閣江亭春正深黃鶯百轉有餘音自慚分判頒條政  
誰信常懷易俗心吟次落花浮硯水靜中飛絮滿簾陰  
及瓜即是歸丹闕莫惜時來一訪尋

登疊嶂樓

郡在江湖烟樹間謝公遺躅好躋攀詩中勝景堪吟嘯

池上清風自往還，凝思但憐雲映水。  
迴頭不覺日銜山，  
登臨屢起歸與與，看是槐花滿故關。

和安儀鳳

水國迎涼暑氣消，思清吟嘯語雄豪。  
遠如海樹黃雲晚，健比秋風白浪高。  
酬答愧無明月珮，縱橫爭及解牛刀。  
和詩送別昭亭路，何似金鑾奪錦袍。

送安儀鳳

宣城相送思依依，正是紅蓮菡萏時。  
行色迎秋清似畫。

別情因景化為詩人離湖水南邊岼蟬聽槐花北向枝  
天子文明是何地丹霄岐路莫生疑

寄樊郎中

近遣司賓小吏時寄書兼寄十篇詩自慚不是陽春曲  
誰敢徵求作者知壘嶂晚登空遠望昭亭別後倍相思  
夜來還有微吟興風動新荷月滿池

謝晏公

吟成大雅百篇詩首首清新鑒者誰草卷密封先見贈

藥欄斜倚看多時  
意如虎窟難中得  
字比雲峰險處奇  
珍重十僧聲  
價外江南屈指即吾師

早秋言懷

清秋江國有餘暄  
謝朓遺風稱雅言  
簾下水亭人吏靜  
窻分竹閣簿書繁  
坐來幽蝶雙飛過  
吟次高梧一葉翻  
自笑無能益公事  
將何才術報君恩

咸平集卷十五

欽定四庫全書

咸平集卷十六

宋 田錫 撰

律詩七言

寄江南諸相知并序

錫自復命丹墀改官秘省翌日中書傳帝旨授綸言承  
要衝委用之恩倅近甸轉輸之職因拜表上樂府新解  
十卷升平詩三十篇驟蒙聖恩遷升小諫澤國桃花之  
色俄染華纓丹臺藥簡之文遽司編綴未及徧飛牋翰

遠謝交朋俄間信自於宣城并閱寄來之雅句因得七  
言一章聊用奉酬仍錄所進升平詩以為遠信寄陳處  
士微公廬江秀才

詩成奏入冕旒前小諫官資驟轉遷帶職喜為仙館吏  
立班常近御爐烟清華拜命知深忝審諤非才愧昔賢  
多謝宣城舊知己寄來新句滿花牋

乾明節祝聖壽

十九首內七首  
流落此下河朔

百辟歡呼降誕辰金樽獻酒願千春延年不假丹砂効

享壽全由聖德新古物進來兼藥鼎畫圖呈處有仙人  
君恩若賞歌詩意應念甘泉侍從臣

生日稱觴自六宮香焚甲觀畫堂中太平歷數歸英主  
上壽年齡屬聖躬玉樹有花因瑞雪鈞天呈曲在虛空  
三公進賀禎祥事先奏河清達帝聰

吾皇享福自無涯百辟稱觴禮數加韶樂揭天如上界  
鑪香映日似輕霞空中紫氣圓成蓋海上蟠桃暖放花  
感應聖人千萬壽神仙日月屬官家

皇朝令節號乾明萬國嘻嘻若大庭多士進詩隨禹貢  
千官獻酒祝堯齡天香曉降聞仙樂南海秋來見壽星  
黎庶更思瞻盛禮待封日觀禪雲亭

鸞盃進酒近天顏拜舞風清響珮環瑞日正高重御宴  
掖鞭纒定再催班霓旌絳節仙家樂金闕銀臺海上山  
綺陌晚來迴望處建章樓閣紫雲間

聖節祥烟藹御壚殿庭嚴肅響山呼赭袍日照來天上  
玉珮風清侍坐隅古字數行仙藥訣蛟綃十幅壽星圖

遠方拜表來朝貢兼賀虹流電繞樞

漢家臺榭與天通甲觀蒼蒼紫氣中佳節夜來宣受賀  
壽盃朝進祝延洪管絃嘈噴驚花發風日清和向雪融  
宴次宮鸚忽飛過隨呼萬歲語玲瓏

君王降誕繼陶唐每至嘉辰覩異祥宮樹曉來生瑞露  
金門夜半有天香皇親朝覲隨章奏中使頒宣散道場  
萬國人臣皆悅樂巍巍聖德自無疆

慶誕長生寶殿中非烟五色覆諸宮酒為天祿資君壽

曲奏霓裳樂帝聰翡翠簾前雲氣紫珊瑚枝上雪花紅  
太平天子間稱賀先喜年年遇歲豐

聖節思歸會帝京得隨班列祝文明河清見底為嘉瑞  
海水無波表太平月夜忽聞仙樂奏宮中時有彩雲生  
詩成拜表同封進願繼詞臣雅韻聲

日上扶桑第一枝東方樓閣曙光時萬邦將啟乾明宴  
兩制應宣御製詩樂感羽毛皆率舞神和福祿自來宜  
諫垣班列天顏近暫乞歸朝侍玉墀

河朔雖云近帝鄉時逢慶誕祝君王身心常在三清路  
曉夕先裝一炷香聖壽如山隨地久恩光似日與天長  
微臣所貴無他物惟獻新詩十九章

相州郡樓贈高祕丞

年來歸興憶皇州頻向花時倚郡樓南陌春光芳樹遠  
西郊山色晚雲浮國家無事邊陲靜風俗還淳禮讓修  
吟得新詩謝知己將何才術稱分憂

贈楊監察

坦時相州通判

昔日長安際會時  
客情鄉思兩依依  
金門次第俱升達  
雲路高低各奮飛  
御史班資知任重  
諫官章綬愧才微  
今來共理藩宣事  
自古相逢似此稀

郡樓書懷

館殿嘗為侍從臣  
出分憂寄牧黎民  
時平事簡多公暇  
樓迥風清欲暮春  
樹杪壺關千嶂疊  
天邊漳水綠波新  
帝鄉永日憑欄望  
心羨浮雲向紫宸

池上

溝塹新分野水來池邊日夕自徘徊餘花飛盡空芳樹  
落絮繁多滿綠苔輦下歸心春館殿天邊凝睇晚樓臺  
郡齋欲立題詩石御史丞郎各有才

暮雨

春天寒慘欲昏黃數點霏霏忽繞廊城漏暗催相共滴  
花塵輕濕乍聞香風生水際來將密雨打簾文灑處光  
獨向郡齋心自喜豐年宜賀待飛章

中夜聞泉

昨日西山野外通聲如秋雨帶松風誰憐鄴下重城夜  
却似江南解署中燭燼垂花飄硯席月華凝雪映簾櫳  
此時新得潺湲聽吟詠狂思學謝公

言懷

遠山蒼翠滿西樓  
亶甲遺風古相州  
春晚落花經雨盡  
夜來寒水繞堂流  
詔條靜理無才術  
袞職思歸待冕旒  
吟寄良交若為意  
安眠不得似諸侯

呈楊侍郎

權分憂寄理漳濱惠化何曾及相民條奏事宜思復古  
興修風教望還淳靜當細雨初封印吟對餘花自送春  
清景好陪池上酌故人情分最相親

除夜

紅燭垂花酒滿卮繞廊風細動簾帷已從半夜分春漏  
即是平明受歲時右省轉官因大慶元正立仗憶丹墀  
吟思何日承宣召却得金門和御詩

元日

去年元會立班時  
簪綬光輝與禮儀  
今日洛川逢歲旦  
延留賓客樂昌期  
朝雲暖潤輕陰散  
晚日融明瑞景遲  
遙念皇州春色蚤  
宮花欲發萬年枝

漳川即事寄韓丕拾遺

漳濱柳色弄微黃  
春日情懷詠載陽  
自念安邊無上策  
如何補袞與周行  
身如迴雁來河朔  
心似浮雲在帝鄉  
吟寄昌黎韓小諫  
嘉謀應有好封章

紅樹此下睦州

秋來嘉樹色堪攀  
紅葉沿溪復映山  
半露寺樓深掩裏  
密籠漁舍夕陽間  
吟看搖落堆金井  
醉賞扶疎對玉顏  
水國却疑春野秀  
似花幽鳥正關關

聖節有懷

南山晴靄御爐烟  
迴望長安白日邊  
率衆謝恩呼萬歲  
思歸侍宴已三年  
翠微鐘磬行香寺  
紅葉樓臺祝壽筵  
吟想皇州晚來景  
雲間宮闕夕陽天

秋夜有懷寄副翰宋白舍人

秋聲蕭瑟北山椒  
賴有琴樽遣寂寥  
書幌靜憐斜月鑒  
牕燈寒帶落花挑  
久辭知己來江國  
少寄音書過海潮  
因想玉堂今夜直  
建章宮漏正迢迢

釣臺懷古

閒讀銘詞掃綠苔  
溪邊永日自徘徊  
白雲遺跡今親到  
青史高名不可陪  
千古烟霞為已有一竿  
風月避誰來  
松巔老鶴應相識  
時唳和風下釣臺

郡齋書事

江天短景莫相催  
三度逢花折早梅  
仙棹遠歸思李郭  
廬山高會憶宗雷  
林端忽見孤雲出  
池上欣聞好客來  
昨夜月明霜更苦  
卷簾黃葉滿青苔

暇日偶題

年來吟髻已星星  
烏石谿邊葉又零  
簾下孤燈刪草奏  
牕間墨嶂讀茶經  
瘴鄉怕襲山嵐毒  
野艇嫌衝水霧腥  
天末豈忘歸去意  
白雲掩映數峯青

桐江即事

滄洲深隱未言歸三載桐江解印遲  
官職清華非不達性靈疎拙欲何為  
閒移夫子青山廟擬立嚴陵釣渚碑  
兼喜谿雲每相狎時來牕戶伴吟詩

秋霖

菊花潦倒雨冥冥秋菌參差上壁生  
臺榭可堪閒眺望池籠不快野心情  
猿啼山館寒無夢燈背風簾滴到明  
却為農家妨畝穫叢祠精舍擬祈晴

和溫仲舒殘春遣懷

丹闕年來奏賀頻  
金輿侍從望東巡  
越王江上重回首  
巖子臺邊再送春  
水國山川怡道性  
花時琴酒悅吟神  
烟霞肯欲留君住  
宰相方謀用故人

郡中遣意寄友人

谿雲澹澹浪悠悠  
十二州中最小州  
花落喜過流水寺  
月明懶下看潮樓  
藥欄棋潤秋重換  
棋局松陰夜不收  
吟寄故人如借問  
釣魚磯在海西頭

桐江詠

桐谿湛湛見游鱗  
搖落楓林繞水濱  
秋色數行沙上雁  
殘陽一簇渡頭人  
藍鮮片竹過深澗  
雪吼寒潮入富春  
俱是謝公吟咏地  
伊余何以繼芳塵

偶題因懷張王二諫議

理郡三年政未聞  
孤城僻在浙江濱  
金門路遠書難寄  
水國吟餘日又曛  
半夜啼猿千里客  
數峯殘雪一谿雲  
詩中贏得為官況  
不讓樊川杜使君

七里灘

清泚寒流走白沙釣臺蒼翠遠嵯峨隔谿人語穿芳樹  
旁岼魚跳落淺莎幾處上源堪涉渡有時野艇并來過  
秋聲不盡吟詩意七里潺湲奈爾何

和溫仲舒寄贈

桐江秋水錦鱗肥閒釣烟波是見機  
筇步共游芳草徑吟情對啟白雲扉  
醉來拾筆題紅葉睡覺憑欄望翠微  
官滿替人如未到蒹葭玉樹且相依

和溫仲舒感懷

郡齋松蓋翠斜欹客至鳴琴汎酒卮江上正當搖落景  
天涯空惜太平時雪殘幽谷春難到蘭茂深林衆豈知  
上國三千五百里楊梅熟日是歸期

倚樓

西樓吟倚若為情情似浮雲處處生翠疊亂山千里濶  
紅翻晴葉一川明散分野色漁村小斜襯秋光雁陣橫  
迴望帝鄉歸未得蘆花如雪繞江城

秋懷

蒹葭深處古巖州  
吟向潺湲為送秋  
雲映疎鐘紅葉寺  
浪搖孤角翠微樓  
土茅路遠催先貢  
霜稻天晴趁蚤收  
零落黃花正哂笑  
應憐印綬尚淹留

題天竺寺

三月楊花撲馬飛  
聯鑣來款白雲扉  
湖邊鐘磬含清籟  
樹杪樓臺靄翠微  
野景留人狂欲住  
春光啼鳥勸思歸  
萋萋芳草重迴首  
十里松門照落暉

茱萸堰泊

茱萸堰下泊行舟初落帆  
檣暮雨收寒水漾烟輕似縠  
微雲籠月澹如秋登封自惜  
天涯去盛事空思國史脩  
達曙不眠燈耿耿寺鐘遙聽  
在西樓

咸平集卷十六

欽定四庫全書

咸平集卷十七

宋 田錫 撰

古風歌行

讀翰林集

太白謫仙人換酒鸕鷀裘扁舟弄雲海聲動南諸侯諸  
侯盡郊迎葆吹羅道周哆目若餓虎逸翰飛靈虬落日  
青山亭浮雲黃鶴樓浩浩歌謠興滔滔江漢流下交魏  
王屋長揖韓荊州千載有英氣蘭君安可儔

寄宋白拾遺

醉中別大梁西歸渭水陽飄然何所似浮雲辭帝鄉歸  
來驚歲晏悵然增浩歎景短條云暝夜寒難至旦拂酒  
雪花飛早梅思南枝碧落周星紀青陽換歲時雙魚忽  
得書云已外華籍金骨俄輕舉玉霄仍近密小諫官職  
清大才文翰逸獻納有嘉謀英豪伸壯圖萬乘是知己  
三公駭竒士嚴吾侍從臣元白才名子揮毫爛彩霞逸  
性飛湍水不日續絲綸鼇宮承帝旨伊余重交結白日

貫精誠黃金一諾重鴻毛萬事輕微塵彈余冠清泉滌  
吾纓思佩朝天錄相將昇太清

塞上曲

秋氣生朔陸塞草猶離離大漠西風急黃榆涼葉飛襜  
褰罷南牧林胡畏漢威藁街將入貢代馬就新羈浮雲  
護玉關斜日在金微蕭索邊聲靜太平烽影稀素臣稱  
有道守在於四裔

塞下曲

黃河瀉白浪到海一萬里榆關風土惡夜來霜入水河  
源凍徹底冰面平如砥邊將好邀功夜率麇兵起馬渡  
疾於風車馳不濡軌盡破匈奴營別築漢家壘拓土過  
陰山窮荒為北鄙天威震朔漠人心畏廉李所以龍馬  
駒長貢明天子邊夫苟非才怨亦從茲始

結交篇

為簪莫用玉玉脆長憂折連環須以金金堅永無缺陳  
餘尚個儻張耳重交結事勢俄參商干戈自屠滅意斷

如玦離情忘若絃絕始志何綢繆終誓何勇決我願然  
諾心不得輕相悅

投杼詞

孝為百行本至性由天資曾參善事母母氏賢且慈馨  
膳以饋進承意惟歡怡高堂既自樂織室閑鳴機飛語  
忽來告明識潛深思蓋念事吾孝安得殺人為亟聞寧  
不信投杼遂生疑乃知君臣際反以交朋推道德難結  
固恩情有合離毀譽苟不入讒間無以施景慕魏文侯

滿篋留謗辭樂羊在中山委遇終不衰

儼古 十六首

崇谿出精金百鍊無餘滓鑄得芙蓉劍靈揮若秋水陸  
可斷犀兕陰亦驚神鬼照物雙影寒中宵靈氣紫有時  
風雨至欲作龍蛇起海酒與陵肉寶燭延奇士酣飲取  
傳觀英圖各相視吐氣成虹蜺將平不平事大笑荆軻  
輩卒如兒女子

中山魏公子志意邈難儔朝吸沆瀣精遠與溟鴻游風

高江浪惡雲黃海樹秋青山對獨酌明月在孤舟心常  
懸象魏迹若參公侯縱橫致君術思一伸良籌

遊子中夜心功名忽嗟暮阜貂空上書甘泉方獻賦白  
日驚壯齒青雲有英顧收采芻不時珊瑚亦生蠹

漢鼎鴻毛輕諸侯爭弄兵吳魏已先定玄德思功名據  
鞍髀肉消感激淚沾纓南陽有奇士三顧精誠傾龍變  
得風雨指麾霸王成日月若長在永永懸英聲

碧落登真訣太霄藥簡書安得松喬子仙階一授余載

攬彩霞綵去登紫雲車飄然遠氛俗志逸如龍攄

曲逆漢功臣少年嘗窘厄巷館雖席門軒車盡嘉客事  
魏言不從說楚謀無獲來降隆準公罄伸圖霸策絳灌  
競生妬讒非相見迫封金欲拂衣將舉鸞皇翮豁達英  
主心信遇終無隔小節不掩名勲庸自輝赫

禰衡鸚鵡詞揮翰無停綴狂甚於接輿才不容當世身  
居桴鼓下心在雲天際黃祖恂忿來殞之如虎噬淺水  
游巨魚宜失縱橫勢

玉樹拭不滅，柳帶柔堪結。惠然貞婦心，皎若天山雪。羅  
幕生春風，珠簾鑒秋月。滄波鷺又歸，尺書胡斷絕。

萱花不須折，安足忘君憂。青銅莫頻覽，適令驚鬢秋。謝  
安壯未仕，定遠晚封侯。功名俱磊落，時來豈自由。

直言如霜刀，卒發傷人意。痛貫丹誠中，無與金瘡理。絨  
恨若癩痕，終身難棄置。伺隙果報時，遂陷無情地。雖悔  
安可追，弗及同奔駟。君子慎樞機，言之豈容易。

楚畹種芳蘭，發生逢早春。萌芽初戢戢，枝葉俄莘莘。幽

叢秋既老芳氣冬彌薰馨香當還風晦靄來襲人百草  
莫相妬從之為爾鄰深林莫蓋藏芬然亦自伸朝采暮  
采采虹綬瓊瑤人

天風吹雨來黃土為柔埴一經女媧手蹶然舍性識悲  
哉商子孫不能述祖德愚朴變澆漓化之尤費力

余聞靈鳳膠可以續斷絃又聞返魂香招魂以其烟因  
念三季時人為世態遷遷之不自覺純信成險艱中含  
妬與忌外即怡溫顏覆人如覆舟先示其甘言中夜蹈

虎尾霧海生波瀾投彼機會時傾亡果忽然願得靈鳳  
膠續之以仁賢願得返魂香返其淳化源免令古樂府  
高歌行路難

廣陵秋節半旗鼓迂靈濤鮪沈雲海遠風激雪山高壯  
哉水濱人游為水中豪弄濤若平地輕命如鴻毛古稱  
公無渡終渡堪悲號憑深良足畏知險可先逃甘言毒  
人藥巧笑剗腸刀狎玩終罹禍險甚於滔滔昭然聖賢  
誠勉旃於爾曹

赫赫英豪士韓侯令子孫千金募死士博浪報君冤國  
恥尚未雪驥足俄驚奔待搏如猛虎未耀同朝暉伯畧  
師黃石大計當鴻門談笑定安危功業遂隆尊鸞皇不  
啄粟麒麟不駕轅將從赤松游高謝漢皇恩一旦君臣  
中奪宗物論喧片詞為密勿四皓如飛飈進退存亡間  
以智為身藩

嶧陽生孤桐擢幹百尺高風雨萌枝葉鸞皇棲羽毛天  
質自含響衆木非其曹斲為綠綺琴古尺貞金刀所製

有法象不敢差釐毫重詳舊譜錄試撫觀均調其聲清  
以庶聞者不貪叨其音安以樂令人消鬱陶彈宮聽於  
君君德如軒堯彈商聽於臣臣道如夔臯不覺起蹈舞  
形逸同翔翺願以七寶粧薦之於天朝玉軫朱絲絃輝  
華近頽袍一彈南薰曲解愠成歌謠

咸平集卷十七

欽定四庫全書

咸平集卷十八

宋 田錫 撰

古風歌行

千金答漂母行

止水明沈沈鑒貌未鑒心丹鳳舞蹒蹒知聲未知音楚  
王欲圖霸不識韓淮陰淮陰漂母家獨得千黃金

雉媒

東風麥蘢青白日桑陰清一雉欲媒衆衆雉無猜情五

步一飲啄十步一飛鳴閣中觸駭機鏃發如流星洞徹  
羽毛質低摧錦繡翎卻宛若召容子常非好兵讒言既  
交構禍難即隨生齊王聽游說韓信急功名三軍雖罷  
戍一命遽遭烹古來不疑地悔吝堪相驚

鬻冰詠

赫日生炎暉鬻冰方及時邀利有得色冰消俄若遺兩  
失俱無猜雖悔安可追仁惠當務速勿使失其宜

辨惑篇

春樹桃與李，美果終得嘗。莫樹枳與棘，芒刺還相傷。君子所樹黨，在擇賢與良。其黨苟非人，為禍亦自殃。蓄者本鈇刀，用欲如干將。拳者本款段，騁欲伴驕驕。辨之胡不早，堅冰自履霜。

江南曲三首

金蟬飾綠雲，細靨蘂黃新。南浦解清珮，西谿采白蘋。客竹映深花，湖山日欲曛。春腸知己斷，脈脈兩難親。

吳艷若芙蓉，乘舟弄湖水。日照影不知，休雲鬢墮替。珥含

笑忽迴頭見人羞欲死歸去入花谿棹濺鴛鴦起

金陵王氣消六朝隳霸業白雲千古恨空江照樓堞虎  
邱羅蔓草姑蘇委楓葉懷賢思伍員靈濤浩難涉

贈宋玄道士

憶昔長安道與君初相識密雲滿天來不見南山色美  
酒斗十千一醉情歡然胸中雲夢澤眼底高陽客狂呼  
月華人撫弄雲和瑟揮鞭過渭川館第相留連朝簾杏  
花露暮樓楊柳烟流輝今六稔交情益相審忽忽披君

文如截機頭錦余本生天涯散金常破家東方上書志  
高欲凌丹霞安能常戚促雀啄秋田粟海路與天遙鸞  
皇好相逐

華清宮詞

繡嶺蔥龍浮瑞氣雲樓靄闕明珠翠禁城緣嶺連九天  
一片笙歌如鼎沸我恐紫麟丹鳳洲移於近甸資宸游  
東將太華為城雉北以渭川為御溝又疑西王開月圃  
白雲仙都紫雲府碧瑤新宮初構成借與明皇自為主

開元之末天寶初天下太平方晏如萬幾多暇頻游晏  
青門道士馳鑿輿長樂岐頭霸陵岍新豐市井驪山畔  
百里烟波錦繡明寶馬香車若珠貫宮中湯泉琴瑟文  
潺湲長以蘭麝薰白玉蓮花盛飛浪珠堂繡殿溫如春  
貴妃承恩貌傾國三千宮女朝霞飾謝家有女名阿蠻  
歌舞纖柔柳無力頻喚入宮恩寵厚金粟臂鏤頒賜得  
秋來嶺上霜月明光照組練金吾兵槐烟柳露咽宮漏  
玉笛一轟巖壑驚春來嶺下春波綠夜聽琵琶將理曲

幽咽輕攏慢撚聲鸞皇引雛啄珠玉嘗記乘輿避暑時  
御衣輕似紅蕖絲翠輦將游石甕寺探得姚崇乘小駟  
往來綠樹影中行清涼適稱逍遙意荔枝顏色燕脂紅  
生於南海烟瘴中南海地遙一萬里使臣日貢華清宮  
六宮每從鑿輿到遺珠落翠長安道百司既奉玉乘歸  
湯宮橫鑱黃金扉門戈陞戟皆繡衣朝鐘暮鼓含清輝  
參差天上朝元閣往往紫烟飛皓鶴至今碧落星宿繁  
猶似當時掛珠箔

曉鶯

春宵已闌更點急烟柳濛濛露花濕畫堂深邃樓閣寒  
碧紗窻中月華入蚤鶯百轉催朝陽簧言綺語何鏗鏘  
雲飛雨散夢初破時聞滿枕梨花香聲宛轉十三絃高  
指撥軟宮喉徵舌多改變圓於珠細於線韻玲瓏湘妃  
調瑟烟靄中珠纓寶玦遞相觸東風細響修篁叢或纖  
柔兮同彩縷繡得輕烟織微雨或輕麗兮如彩毫畫成  
曉景描春朝間闌歷落意不盡花中似索鶯皇饒逡巡

曙色浮林際菊花毛衣金作袂一片蘇張俊辯心長與  
春皇巧游說

晚雲曲

高唐晚峯欲生雨空山啼猿風嘯虎春雲數片留南浦  
自與鴛鴦共飛舞

御溝

春半桃花水初下一溝潤綠光如研夾道官城數里中  
靜稱潺湲明月夜千門萬戶建章宮金鑠橫門溝閶通

三月花飛若零雨水聲何處咽香紅

惜春詞

春色初從江國來湖邊楊柳嶺頭梅花飛雪柳垂帶  
遍次相將時節催春力欺寒過江北深谷黃鸝生羽翼  
曉月輕烟禁苑啼南園桃李已成蹊就中何處芳菲好  
春波飛絮魏王堤我憶去年暮春月京洛新粧丹鳳闕  
天津水綠烟樹深萬井笙歌牡丹發天子鑾輿駕幸時  
嵩峯瑞靄籠郊圻扈從千官與萬騎翊衛羽林兼伙飛

六宮隨駕羅珠翠諸王從行陪七貴香氣成霞金犢車  
鳴珂中節虹龍駟朱橋細柳端門前畫舫橫塘會節園  
朝花貴俠珊瑚席夜燭嬌娥玳瑁筵西樓殘月深宮漏  
明河半沈垂北斗縱飲貪歡意未闌紫陌喧喧人已繁  
玉鈎掛簾開雉尾曉日赭袍朝至尊方今寓止臨清渭  
杜門無與天涯異殊忘詩酒狂蕩心但悅琴書高古意  
可惜春芳漸欲歸五陵烟草方離離迴憶當時洛陽道  
歌魂空與殘花飛

風箏歌

白蘋洲暖春風生畫樓檻上銀箏鳴鏗鏘節奏急復慢  
空中一部天樂聲三十六宮深窳窳綉楣藻井光相照  
十三絃上千般聲朝靄微吟暮烟嘯夜來親向月中聞  
繁音錯節何紛紜碎如鸞鈴與珂珮巫山隊仗迎湘君  
晚來金屋愁微雨風細箏聲不全舉依稀嬪妾怕人知  
啾啾切切私相語洪纖斷續何所拘鳳凰著對飛鸞孤  
梧桐枝邊泊未穩琅玕島上鳴相呼有時方奏俄中絕

宮商斗頓如刀截杏花露重鴛鴦寒空見如霜滿庭月  
有時半日全無風一一暮天樓閣紅惟聞鳥雀啄絃上  
暖珠寒玉何玲瓏清音朝朝與暮暮誤聲不管周郎顧  
祇嫌雅鄭交奏時寶鐸丁冬閣相妬

聖主靖邊歌

玉關秋早霜飛速代馬新羈逞南牧夷人背信闕漢邊  
刻箭為書召戎族漁陽烽火照甘泉疆吏飛牋至御前  
睿謀英武何神速鑾輿自欲平三邊百萬羽林隨駕出

殺氣皇威先破敵，賊臣喪膽遽奔逃。  
漳水波清因駐驛，宮錦戰袍花鬪新。  
綉鞵珠絡金麒麟，天顏威武不可犯。  
垂鞭按轡示羣臣，金吾隊仗如鱗萃。  
環衛旌旗徑千里，漢王曾上單于臺。  
壯心磊落伴風雷，比量英武不足數。  
聖文神武雙全才，勢可驅山塞滄海。  
紫氣逶迤龍鳳蓋，金花簇斂若星羅。  
寶鈿乘輿翼雲旆，塗山禹帝戮防風。  
涿鹿蚩尤死戰鋒，鋒鋌俱染玄黃血。  
爭如不陣而成功，示服皇歡有餘意。  
御筆題詩饒綺思，翰林承旨先受宣。

西掖詞臣及近侍詔命交誨繼和來君臣道合何如是  
和氣感天天地寧日融瑞景籠八紘風生旗旆翻龍鳳  
霜嚴鼓角喧雷霆海神來受軍門職太上禱兵尊帝德  
牢籠萬國埏同壤天網恢恢恩信廣羌兒潰散何所之  
大明升空逃魍魎漳川地濶霜草平合圍會獵布天兵  
六師雄勇一百萬六班侍衛交縱橫鐵衣間耀金鎖甲  
鼓旗雜錯槍刀鳴霓旌似繫單于頸獵騎如破匈奴營  
鷗鷺猙獰搦狐兔花驄躍龍驕在御弓圓明月金鏃飛

妖狐中鏃駭天機  
兵帥會合如波注  
山呼萬歲震邊陲  
東海為樽盛美酒  
斟酌酒漿挾北斗  
鸞刀割肉若邱陵  
軍聲汹如獅子吼  
三公拜舞百辟隨  
鳴珂飛鞚星離離  
雲舒二十有四纛  
傳宣罷獵整魚麗  
勝氣威聲壓千古  
堪笑驪山稱講武  
直館微臣樂扈隨  
太平盛事今親覩  
會看金泥封禪儀  
拜章別獻新歌詩  
歌詩何以容易進  
為受文明天子知

咸平集卷十八